

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Indona leh inbeihna thleng palha mipuite inpuahchahna dinhmun hriat nan ramchhung hmun dang te rualin vawiin khan Aizawlah mock drill neih a ni.
- 2. Larsap General (Dr) Vijay Kumar Singh an vawiin khan ni 2 awh tur 'National Workshop on AI-Driven Financial Empowerment for Mizoram' chu MZU Auditorium-ah a hawng.
- 3. India sipaite chuan nizan zanlai khan Pakistan leh Pakistan Occupied Kashmir-a firfiakte awmna hmun pakua an kap.
- 4. Political Party hrang hrang hruaituten politics dah thain Operation Sindoor an fak.



MOCK DRILL

Indona leh inbeihna thleng palha mipuite inpuahchahna dinhmun hriat nan ramchhung hmun dang te rualin vawiin khan Aizawlah mock drill neih a ni.

Kan corr report lo ngaithla ang.

Vawiin a Mock Drill hi Tuikhuahtlang AIR Station leh Civil Hospital inkarah neih a ni a. Indo thlawhna in van atanga chanchinthar thar thawn chhuahna hmun a rawn hmuh theih loh nan, AIR station chung chu enchhin nan khuh bo a ni a, dar 11 ah DC Office Aizawl atangin siren tihrik a ni bawk. Mock Drill thawh khatna AIR station ah hian indo thlawhnaa inbeih thulha inralrinna Air Raid Siren hman dan turte leh civil mite leh zirlaite tan hmelma te beihna thlen thulha mahni inralrin leh inven dan turte enchhin a ni a. Hei bakah hian indo thlen thulha harsatna thleng thei hrang hrang kawlphecha chhia avanga buaina leh hmun pawimawh hum dan turte leh insaseng dan turte pawh enchhin a ni dawn bawk a ni. AIR station atanga Civil Hospital kawng dungah Mizoram NCC techuan Aizawl Traffic Police te anlo duty pui bawk ani.

(Chawngthanpuia Akashvani News Aizawl)

He mock drill hi ramchhunga indo leh harsatna liantham thlen thula mipuite lo inbuatsaih lawk theihna tura duan a ni a, Additional DC, Pu Zoramsiama Hmar chuan mock drill tah hian search and rescue team, medical team bakah AIR station atanga Civil Hospital inkar traffic duty turin Aizawl

SP bakah NCC te ruat an nih thu a sawi a, Controll room ah District Administration thawktu bakah Aizawl SP thawktu te an awm bawk a ni.

(NCC BYTE)

Addl DC chuan Mock Drill hi vawiin tlai lam ah chhunzawm a nih leh tur thu a sawi a. Aizawl khawpui power supply chu vawiin tlai dar 6:30 leh 6:35 PM inkar ah tihtawp a nih bakah siren tihrik a ni leh bawk ang. Aizawl khawpui chhung Black Out chhung hian lirthei tlan zawng zawng te chu awm hmunah din vek tur a ni a, lirthei engine leh light pawh off vek tur a nih thu a sawi a, damdawiin a life support hmang mek heng ICU awm mek leh oxygen hmang mek ten buaina an tawh loh nan damdawiin enkawl tu te chu generator nen loin ring tur in a chah.

<><><>

UNION MoS VISITS KHAWZAWL

Union Minister of State for MSME and Labour & Employment Pi Shobha Karandlaje chuan vawiin khan Khawzawl district a tlawh a, Khawzawl office hotute nen inkawmin Khawzawl leh Chawngtlai khaw hmun hrang hrang a tlawh bawk.

Union Minister Pi Shobha Karandlaje hi Khawzawl DC Pu K. Vanlalthiana leh hotu dang te'n an lo lawm a, District thuneitu hrang hrang ten district-a hmasawнна hnathawh chungchang hrilhhria in PowerPoint presentation an pe a, department hrang hrang hmalakna leh scheme hrang hrang tarlan niin Union Minister Pi Shobha Karandlaje chuan department hrang hrang zawhna a zawt a, hotute chu fuihin district tana theihtawp chhuah turin a sawm a ni.

Union Minister of State hian nimin khan Lengpui Airport a lo thleng a, Sihhmui, Sairang leh Ramhluna PMEGP hnuiaia hmathatna dawngte a kawm nghal a, Minister chuan Sawrkar laipui ruahmanna hnuiaia hamthatna dawngtuten an khawsak dinhmun chawikan nana PMEGP hnuiaia eizawнна ngelnghet an nei thei chu lawmawm a tih thu a sawi a, Sawrkar laipui scheme hrang hrang hnuiaia hlawhtlinna changtu leh ram hmasawнна thlentu nih tum tlat turin hamthatna dawngtute chu a chah a ni.

<><><>

GOVERNOR

Larsap General (Dr) Vijay Kumar Singh, Mizoram University Chief Rector chuan vawiin khan 'National Workshop on AI-Driven Financial Empowerment for Mizoram' chu MZU Auditorium-ah a hawng.

Larsap hian Sawrkar laipui Department of Science and Technology hnuiaia Tribal Area Sub Plan Scheme hmanga project leh entrepreneur tanpuina pekte tarlanna booklet a tlangzarh nghal bawk.

Sorkar laipui Department of Science & Technology, MZU leh IBITF, IIT Bhilai tangho buatsaih he workshop hi ni 2 awh tur a ni a, Larsap chuan Artificial Intelligence tangkai taka hman a nih theih nana inzirtirna workshop buatsaih a ni chu lawmawm a tih thu sawiin, IIT Bhilai-in North Eastern Region tana Tribal Area Sub Plan Scheme hnuiaia AI Driven Financial

Technology Project 36 a kalpui zinga 11 lai mai Mizorama kalpui a ni chu lawmawm a tih thu a sawi a. AI tangkaina chuan thingtlang kilkhawr zawka chengte thlengpha ngei se a duh thu sawiin, mithiam kalkhawmte chu mipui nawlpui tana hriatthiam awlsam leh tangkai taka hman theih tur ngaihtuah chung a hma la turin a chah a, Project Investigator leh Co-Project Investigator-te thawhrimna leh remhriatnate chu mipui tan vanneihna, hnathawh leh khawsak tiawlsamtu a la ni thuai dawn a ni, a ti bawk.

He huna tarlan a nih danin Department of Science and Technology (DST) kaihhruaina hnuaiah National Mission on Interdisciplinary Cyber-Physical Systems (NM-ICPS) chuan IIT Bhilai hnenah Technology Innovation Hub (TIH) host turin sum a pe a. Tunah hian IIT Bhilai hian Financial Technology huangah Mizoram University tan project 6 leh NIT Mizoram tan project 5 a ruahman a ni.

<><><>

LADC

Lai Autonomous District Council Sorkar buai mek chhan chu ZPM Legislature Party vang a ni, tih LADC-a eptu party ten an sawi.

Vawiin khan BJP leh MNF leh pawnlam atanga thlawptu Congress MDC ten an din United Democratic Alliance te chuan Lawngtlai Press Club ah thuthar thehdarhtute an kawm a, Lungtian bialtu MDC Pu Sanghuliana Mualchin chuan LADC ah ZPM Legislature Party ten Sorkarna siamthei khawp Member neilo chung a an kiang duhlo chu mipui zahlohna a an ngaih thu a sawi a, LADC Budget a hman theih loh bakah sorkar hnathawkin hlawh an la thei lo a, hei hi LADC Chairman leh Deputy Chairman chu Governor thu anga an kalloh vang a ni a ti a, mipui humhim aiin an dawhkan humhim tumin hma an la a ni a ti.

United Democratic Alliance Member chuan LADC Chairman in CEM fiahna neitura Floor test neih a nihtheih nan a hmala tura tihna a dawng nawnfo leh a bawhzui duhlo chu Democracy palzutna a nih thu a sawi a, Lai Students Association ten ram tan hma an lakna chu UDA chuan zahawm an tih thu sawiin, Anti Defection Law neih thuai a pawimawh a ti.

Tuithumhnar bialtu MDC, Pu H.Lalmuansanga chuan LADC Politics chungchang a sawifiah a, LADC ah Sorkarna siamthei khawpa Member ngah UDA ten Sorkarna siamtura ke an penna ah Democracy kalphung zahtakin Governor leh State a ZPM Sorkar in hma an la tih a sawi bawk a ni.

<><><>

HIV ORPHANS DAY

HIV/AIDS avanga naupang chanhaite enkawlina Gan Sabra chuan vawiin khan Aizawla I&PR Auditorium-ah World AIDS Orphans Day an hmang a, Adviser to CM (Finance) Pu TBC Lalvenchhunga'n a hmanpui.

He hun hmanpuitu Pu TBC Lalvenchhunga chuan, thil tha ti turin sawrkar fawng chelhtu emaw, thuneihna sang tak neih kher a ngai lo tih sawiin, inpekna thuk tak nena hnathawhin awmzia a neiin, chu chu midang tan malsawmna a ni thin a ti a. Thil tha tih kawnga tan la zel turin kalkhawmte a chah a ni.

HIV/AIDS avanga naupang chanhaite Ni ah hian Mizoram State Child Protection hotute, HIV/AIDS vei te enkawlna lama hma latu flawmngai pawl hrang hrang aiawhte, Home hrang hranga thawktute leh HIV/AIDS avanga harsatna tawk mi engemawzat an tel a ni.

World AIDS Orphans Day puala hun buatsaihtu Gan Sabra hi kum 2006 a din niin, HIV/AIDS avanga naupang changhai leh harsatna tawk te enkawlna hmun a ni a. HIV/AIDS avanga harsatna tawk naupang 40 an enkawl mek a, naupang an enkawl tawh zingah hnathawka mahni intodelh, nursing zir mek leh zir chhuak tawh te pawh an awm a ni.

Gan Sabra hian Community Support and Sponsorship Programme (CSSP) an kalpui bawk a. Sponsorship kaltlang hian Aizawl, Lunglei, Champhai, Mamit, Kolasib, Serchhip leh Saitual District-ah HIV/AIDS avanga harsatna tawk naupang 264 leh chhungkua 118 tan tanpuina pein, an tlawhkual thin. Thla tin an zirna senso, ei leh in bakah damdawia inenkawlna an tumsak thin bawk.

Heng tanpuina bakah hian Anti-Retroviral Therapy (ART) damdawi pawh an semchhuak thin a, HIV/AIDS avanga nausen harsatna tawkte tan hnute tui (Formula Milk) te an pe thin bawk a ni.

Gan Sabra Chief functionary Lucy Remruati Chhangte chuan, “Tanpuina hi Central atangin kan dawng a, a tam lova, tun ang dinhmun kan thlen theih chhan chu Mizorama kohhran, khawtlang, NGO leh mimal thahnemngai tanpuina min petute vang a ni, a ti.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



OPERATION SINDOOR

India sipaite chuan nizan zanlai khan Pakistan leh Pakistan Occupied Kashmir-a firfiakte awmna hmun pakua an kap. He beihpui hi Operation Sindoor tia vuah niin nizan dar 1.05 leh 1.30 chhungin heng firfiak awmna hmunte hi thlawhna hmanga kah a ni a. Firfiakten an chet dan tur ruahmanna an siamna leh thu an pekna hmun niin sipaite chuan an sawi a. He beihpui an thlak hi uluk taka ruahman niin ram pahnih inkara boruak tih sosan tumna a ni lo tih a sawi a. Pakistan sipai hmunte kah tel an nih loh thu sawiin fimkhur taka bitum turte hi siam fel an ni tih a sawi bawk a ni.

Foreign Secretary Vikram Misri chuan Pahalgam firfiaka chetna chhui anih hnuah Pakistan-in firfiakte nen inzawmna an nei tih hmuhchhuah a ni a ti.

(Byte)

Nizan operation chunchang sawiin Colonel Sofia Qureshi chuan Indian Army ten target pakua an kap a ti a. Heng target te hi kahchhiat vek anih thu a sawi a. Pakistan-a firfiakte camp hi an kapchhia a ni a ti.

(Byte)

Indian Air Force Wing Commander Vyomika Singh pawhin Operation Sindoor chu Pahalgam firfiaka chetna tuartute tana rorelna dik pekna anih thu a sawi a ni.

<><><>

PARTY LEADERS

Political Party hrang hrang hruaituten politics dah thain Operation Sindoor an fak. Union Home Minister Amit Shah-a chuan Operation Sindoor chu Pahalgam-a pawisawi lo unaute rapthlak taka thah an nih chhanletna a ni ti. Defence Minister Rajnath Singh-a pawhin Indian sipaite chu fakawm atih thu a sawi a. External Affairs minister Dr.S.Jaishankar chuan khawvelin firfiaka chetna lakah ngaihnathiamna a lantir tur a ni lo tih a sawi bawk a ni.

Lok Sabha Opposition Leader Rahul Gandhi chuan India sipaite chu a chhuang hle tih social media ah a tarlang a. DMK leh Tamil Nadu CM MK Stalin,TDP Chief leh Andhra Pradesh CM N Chandrababu Naidu, TMC Chief leh West Bengal CM Mamata Banerjee, Samajwadi Party hotupa Akhilesh Yadav, RJD hruaitu Tejaswi Yadav leh BJD hruaitu Naveen Patnaik te pawhin India sipaite fakawm an tih thu an sawi.

<><><>